


neriješen slučaj **Misteriozna smrt Vladimira Cvijića**

MAGAZIN BOSNE I HERCEGOVINE

# start 122

# hronika


23.01.2007. godina II broj 5 BESPLATNO



**BJEGUNCI IZ** ^  
**ZATVORA U FBiH:**  
Preko žice  
do slobode

**KALESIJA:**  
Načelnikov sin  
napao hip-hopere

**NELEGALNO ORUŽJE:**  
Djeca na nišanu  
roditelja

 v

# Forenzika u BiH

# Tragači

# na mjestu

# zločina

# Preko žice do s

**Policija u BiH trenutno traga za 88 bjegunaca iz zatvora. Većina ih je pobjegla prilikom redovnog izlaska koji dobiju kao nagradu za dobro ponašanje u zatvoru. Neki se vrate, neki budu uhapšeni, dok se nekolicina nikada ne vrati na služenje kazne. Ima i onih koji su bijeg izveli bolje nego glumci poznatih krimi filmova**

PIŠE: **Semir Mujkić**  
FOTO: **Arhiv Starta**

Zatvorenik Kazneno-popravnog zavoda Zenica **Emin Isaković** u maju mjesecu prošle godine išao je na redovnu fizikalnu terapiju. Sve vrijeme njegovog boravka van zatvora sa njim su bila dvojica čuvara. Za njih je Isakovićev izlazak trebao biti rutinska operacija koju su uradili bezbroj puta. Ipak, stvari su krenule po zlu kada je nekoliko naoružanih ljudi uz upotrebu sile razoružalo čuvara, a Isakovića su oteli i odveli u nepoznatom pravcu. Raspisana je potjernica, ali on još uvijek nije uhapšen. Isaković rođen 1966. godine u Bosanskom Novom, u zatvoru je bio zbog razbojničkih krađa. Na fizikalnu terapiju je išao zbog rane koju je dobio u svađi sa djevojkom **Eminom**.

### Preko ograde

Iz zatvora u Zenici prosječno godišnje pobjegne 45 zatvorenika. Način bijega uglavnom nije spektakularan i desi se prilikom redovnog izlaska na odmor ili posjete porodici nekog od zatvorenika.

- **Prošle godine iz KPZ Zenica bilo je 4.800 izlazaka zatvorenika. Oko jedan posto njih se ne vrati sa tih izlazaka. Potjernica se izdaje nakon dvadesetčetvorosatnog kašnjenja, a jedna trećina se vrati sama nakon nekoliko dana. Trećinu uhvati policija, a ostali se nikada ne uhapsu** - kaže **Slavko Marić**, zamjenik direktora KPZ Zenica. Ovaj zatvor je, inače,

jedini zatvor zatvorenog tipa u Federaciji za razliku od zatvora u Mostaru, Tuzli, Bihaću, Busovači i Orašju koji su poluotvorenog tipa.

Zatvorenici koji iznevjere ukazano povjerenje uglavnom dobiju zabranu izlaska nekoliko godina. Vrijeme bijega im se dodaje vremenu služenja kazne.

Na bijeg direktno iz zatvora odlučila su se dvojica zatvorenika, 1997. godine, koji su pobjegli iz zatvorske livnice preko ograde koja tada nije imala

zaštitnu žicu. Zatvorenik sa inicijalima **P.S.** nedugo poslije uhapšen je u Hrvatskoj prilikom krađe, te je neko vrijeme odslužio tamo. Istragom se došlo do podataka da je nekoliko mjeseci proveo u Italiji, a nakon služenja u susjednoj zemlji vraćen je u Zenicu gdje još uvijek služi kaznu. Drugi je ubijen u Kiseljaku, također prilikom vršenja krivičnog djela.

### Filmski bijeg

Iz sedam zatvora u FBiH u bjekstvu se trenutno nalazi 88 zatvorenika, većinom nevraćanjem sa izlazaka.

- **Uglavnom se radi o iskorištavanju pogodnosti izlaska prilikom bježanja. Zatvorenik stekne povjerenje i dobije priliku da izađe te se onda udalji. Prošle godine vratili smo devet osoba** - kaže **Rešad Fejzagić**, pomoćnik ministra



KPD Zenica: Jedan posto zatvorenika se ne vrati sa dopusta



## Saobraćaj: Četvorica poginulih u teškoj nesreći kod Brčkog

U teškoj saobraćajnoj nesreći koja se dogodila u mjestu Pelagićevo, na magistralnom putu Orašje - Tuzla, poginuli su **Lazar Damjanović** iz Čović Polja te **Borislav Dugonjić**, **Stojan Pudić** i **Danilo Tomić** iz Brčkog. Do nesreće je došlo nakon sudara automobila **audi A8**, kojeg je vozio

Damjanović, i kamiona marke DAF za čijim volanom je bio turski državljanin **D.A.** (46) koji je pobjegao sa mjesta nesreće. On i njegov suvozač također su povrijeđeni u ovom udesu. Nedugo nakon nesreće oraška policija je na parkingu benzinske pumpe **Antunović**, u neposrednoj blizini graničnog prijelaza Orašje, u jednom od kamiona pronašla odbjeglog vozača.

Prema izjavama očevidaca, do nesreće je došlo kada je **audi**, koji se kretao iz pravca Pelagićeva prema Orašju, u jednom trenutku prešao na lijevu stranu ceste i direktno se sudario s kamionom turskih registarskih oznaka.

O silini sudara govori činjenica da su tijela vozača i suvozača pripadnici Profesionalne vatrogasne jedinice iz Brčkog izvadili pošto su isjegli dijelove potpuno smrskanog **audija** koji se u udesu bukvalno zabio pod točkove teretnog vozila.

Uvidaj na licu mjesta, koji je predvodio **Uzeir Hadžić**, dežurni tužilac Okružnog tužilaštva Doboj, izvršili su pripadnici Policijske stanice za bezbjednost saobraćaja Šamac.



# slobode

za izvršenje kaznenih i prekršajnih sankcija u Ministarstvu pravde FBiH, i objašnjava da se za svako bjekstvo napravi izvještaj i podigne potjernica. Za slučajeve bijega za vrijeme izlaska odgovornost ne nose čuvari ali, kaže Fejzagić, bilo je nekoliko slučajeva u kojima su zatvorski službenici snosili posljedice uglavnom za nesavjesno postupanje. Takav slučaj desio se u junu 2005. godine u Mostaru kada su **Ivan Ivanković** i **Marijan Perković** izveli bijeg kakav često vidamo u filmovima. Iz ćelije 35 mostarskog zatvora pobjegli su tako što su prepilili dvije rešetke te se onda, uz pomoć osam povezanih plahti, spustili niz zid zatvora. Imali su i improvizirane ljestve koje su napravili od dijelova kreveta, a vrećom za spavanje su se zaštitili od

bodljikave žice. Preko krova zgrade za posjete došli su do vanjskog zida koji ih je odveo do kratkotrajne slobode. Perković se sam predao nakon samo dva dana a 40 dana nakon bijega u Ljubuškom je uhapšen i Ivanković prilikom redovne kontrole saobraćajne policije. Trenutno svoju kaznu služi u Zenici.

**- Protiv cijele smjene čuvara vođio se postupak i oni su novčano kažnjeni. Danas je cijeli zatvor pokriven videonadzorom sa 63 kamere, a stavljene su i dodatne bodljikave žice -** kaže **Miroslav Bem**, direktor KPZ Mostar.

Zloupotreba izlaska iz ovog zatvora prošle godine nije bilo. Traga se za ukupno 12 zatvorenika, a svi su pobjegli prije ili u toku rata. Slučajeva pomoći čuvara prilikom bijega zvanično nije bilo. ■

## Kalesija: Načelnikov sin napao hip-hopere



**Ahmo Omerović**, sin **Rasima Omerovića**, načelnika općine Kalesija, i njegov prijatelj **Amel Selimović** verbalno i fizički su napali članove kalesijske hip-hop grupe **AS Dreamers Samira Karića** i **Amira Muminovića**. Razlog napada navodno su pjesma i spot koji su *Dreamersi* snimili o Kalesiji a u kojoj se na indirektan način spominje (ne)rad općinskog načelnika kao i opća situacija u gradu.

Kako su članovi hip-hop dvojica nakon incidenta ispričali, do napada je došlo nakon njihovog nastupa u diskoteci *Mondo*. Po njih je došao prijatelj s automobilom koji ih je trebao voziti kući, ali na dijelu puta iza njih se pojavio drugi automobil čiji im je vozač signalizirao da se zaustave, što su oni i učinili, da bi ih potom izvukli iz automobila.

*- Počeli su nam prijetiti i govoriti da nismo trebali snimati pjesmu o Kalesiji. Nakon toga, Omerović me udario otvorenom šakom u glavu i slomio mi naočale. Poslije kraće rasprave, Ahmo i Amel udaljili su se automobilom u pravcu Memića. Mi smo otišli pješke u Kalesiju i slučaj prijavili policiji -* opisao je napad Samir Karić. Policija je od sudionika uzela izjave.

## Razbojništvo: Maskirani razbojnici opljačkali filijalu Gospodarske banke

U Žabljaku kod Usore maskirani razbojnici uz prijetnju oružjem opljačkali su filijalu *Gospodarske banke* odnjevši neутvrđenu količinu novca. Tokom pljačke razbojnici su iz automatske puške pucali u staklo na šalteru banke, ali povrijeđenih osoba nije bilo.

Prema izjavama očevidaca koje su se pojavile u medijima dan nakon pljačke, tri razbojnika pred banku su se dovezla u automobilu *saab* tamnoplave boje, s italijanskim registarskim oznakama AV 301 W. Dvojica su bila naoružana automatskim puškama, a jedan pištoljem. Svjedoci kažu da su dvojica razbojnika utrčala u banku, iz koje se trenutak kasnije čuo pucanj. U trenutku napada u banci su se nalazili direktor i službenici, ali srećom niko nije povrijeđen. Poslije pljačke razbojnici su se automobilom udaljili magistralnim putem u pravcu Doboja. Istraga o ovom oružanom upadu je u toku.

## Pedofilija: Devet godina robije zbog napastvovanja pastorki

Okružni sud Bijeljina izrekao je devetogodišnju zatvorsku kaznu **Reši Beganoviću** (44) iz Janje, zbog spolnog nasilja nad njegovim pastorkama B.R. (15) i B.A. (17). Prema navodima optužnice koju je Okružni sud u Bijeljini potvrdio krajem septembra prošle godine, Beganović je neутvrđenog dana u maju 2002. godine, u Ulici braće Lazića broj 90, napastvovao svoje pastorko koje je primorao da imaju odnos s njim. Tada im je, navedeno je u optužnici, zaprijetio da će, ako budu pričale o tome, njihovu majku istući i istjerati iz kuće, te da će njima zabraniti izlaske.

Sa B.A. je više puta nasilno održavao seksualne odnose do juna 2006. godine, a sa B.R. još jedanput, 20. augusta ove godine.



# Tragači na mjestu zločina

**Budući Centar za forenziku i podršku pri Upravi Policije Federacije prostirat će se na 2.000 kvadratnih metara i bit će opremljen najmodernijom tehnikom**

PIŠE: Adisa Dedić  
FOTO: Arhiv Starta

Kod istraživanja krivičnih djela vrlo važna karika su forenzične službe gdje se dostavljaju svi tragovi prikupljeni na mjestu zločina. Brojne TV serije o forenzičarima stvaraju predodžbu kako nijedan zločin ne može ostati nerasvijetljen. Odgovor na pitanje da li je to baš tako potražili smo u Centru za forenziku i podršku pri Upravi Policije Federacije. Centar još ne radi u punom kapacitetu, oprema se još instalira, ali i ono što smo vidjeli budi nadu da će Bosna i Hercegovina imati instituciju koja će umnogome pomoći otkrivanju kriminalaca svih vrsta. U konačnici, centar će se prostirati na 2.000 kvadratnih metara i, kako nam je rečeno, predstavljat će jedan od najbolje opremljenih ovog segmenta. Naravno, nije uputno otkrivati sve detalje.

## Sve zavisi od traga

Načelnik odjeljenja krim tehnike Uprave policije Federacije **Mladen Milosavljević** naglašava da rad i rezultati ove institucije zavise prije svega od rada na mjestu zločina, odnosno kriminalnog djela:

- Uvijek sve zavisi od traga, da oni koji dođu na lice mjesta nekog krivičnog djela pronađu bilo kakav trag. U zavisnosti od onoga što su oni pronašli, kako su fiksirali i prikupili trag, nama daju bolju star-

tnu poziciju. Naprimjer, bilo kakav otisak prsta koji posjeduje dovoljan broj određenih karakteristika može riješiti slučaj, na ovaj ili onaj način. Tu je čitav niz tragova i slučajeva o kojima iz opravdanih

razloga ne možemo govoriti.

Centar se sastoji od šest cjelina opremljenih najsavremenijom opremom kakvu koriste FBI ili Skotland Yard. U odsjeku za balistička i mehanoskopska vještačenja rade se vje-



*U sistem su uvezane sve agencije za provedbu zakona u BiH*



*Gordana Radović Rajević, analizira dokaze o tragovima kanabisa*



*Centar se sastoji od šest cjelina opremljenih najsavremenijom opremom kakvu koriste FBI ili Skotland Yard*


štačenja tragova alata, tragova automobilske gume, pneumatika ili automobilske žaruljice. Ovdje rješavaju i nepoznanicu da li čahura pronađena na licu mjesta potiče od metka ispaljenog iz vatrenog oružja koje im je naknadno dostavljeno.

**- Iz vatrenog oružja se vrše sporna ispaljivanja radi dobivanja nespornih čahura. Na komparativnom mikroskopu, znači u istom vidnom polju, promatramo i spornu i nespornu čahuru i tražimo opće karakteristike i zajedničke individualne karakteristike koje se očituju u zajedničkom mikroreljefu unutar tragova od mehanizama vatrenog oružja - objašnjava Bruno Franjić, vještak za balistička i mehanoskopska vještačenja.**

### Savremena oprema

Slijedeća destinacija je laboratorij gdje se vrše ispitivanja svih vrsta falsificiranih dokumenata, rukopisa i novčanica po naredbi tužilaštva. Zahvaljujući savremenoj opremi te radu stručnih osoba, na ovom mjestu lako će prepoznati falsificirane dokumente, rukopise ili novčanice. Vještak za ispitivanje dokumenata i rukopisa **Muhidin Rašidović** uz pomoć kompjuterizirane opreme lako prepoznaje razlike u npr. vodenom znaku, kvaliteti primijenjenih štamparskih tehnika te intenzitetu zaštitnih elemenata.

Vrlo važan segment je i odsjek za



daktiloskopiju i identifikaciju. Bave se ispitivanjem papilarnih linija bez obzira jesu li na prstima, dlanovima ili tabanima. Treba naglasiti da su ovdje već usvojili AFIS sistem za automatsku identifikaciju otisaka prstiju. U sistem su uvezane sve agencije za provedbu zakona u BiH, kako entitetski tako i kantonalni MUP-ovi i centri javne bezbjednosti. Tu je i u modernoj forenzici veoma važan sistem za DNA analizu koji, istina, još nije kompletan. Upravo ovih dana vrši se instalacija COD sistema za DNA bazu podataka koji donira vlada SAD-a putem njenih agencija FBI i ICTAP. DNA laboratorij nalazit će se u sklopu laboratorija za biološke tragove koji je ujedno označen kao prva od šest cjelina. U njemu se ispituju tragovi ljudskog, animalnog i biljnog porije-

kla poput tragova pljuvačke, sperme, dlaka i vlakana. Tu je i odsjek za hemijska i toksikološka vještačenja koji se bavi ispitivanjem zemlje, boje, laka, dijelovima barutnih čestica te droga. Nekoliko trenutaka proveli smo u laboratoriju za klasična hemijska određivanja, dok je trajala analiza dokazivanje tragova kanabisa.

**- Radi se na tzv. tankom sloju, metodom upoređivanja, vrlo popularnom u svijetu. Bazirana je na metodi naših standardnih uzoraka, bilo da su u pitanju droge ili neke druge supstance i spornog materijala koji nam je dostavljen -** priča nam **Gordana Radović-Rajević**, vještak za fizikohemijska ispitivanja.

I posljednja, šesta cjelina koja je specifičnija na prostorima BiH, ali i regiona je odsjek za sanitarno - biološko - hemijsko - ekološko zaštitu. Grupa ljudi koja opslužuje taj odsjek bavi se, u najširem smislu riječi, sanitarno-higijenskim, veterinarskim i zdravstvenim aspektom nivoa organizacije kontrole svih onih protokolarnih državnih i entitetskih manifestacija, a vezano je isključivo za ispitivanje hrane i pića. Naravno, predstavili smo samo jedan dio mogućnosti ovog centra, jer, kao što i sami kažu, nije uputno educirati kriminalce o mogućnostima istražitelja. U okviru rekonstrukcije policije planirano je da forenzična služba radi na državnom nivou. ■



**Bruno Franjić: Tražimo i opće i zajedničke karakteristike**

## Najgluplji kriminalci

### Sakrio se kod šerifa

**Brian Valentino** uspio je pobjeći iz policijskog auta koji ga je prevezio u zatvor i sakrio se u obližnju zgradu. Tridesetogodišnji Valentino razbio je zadnji prozor policijskog auta i još uvijek sa lisicama na rukama pobjegao. U žurbi je izabrao jednu kancelariju i sakrio se iza vrata. Njegov bijeg bi možda i uspio da to nije bila kancelarija okružnog šerifa. Valentino očito nije primijetio veliku žutu zvijezdu na vratima.


Šerifov zamjenik primijetio je čovjeka sa lisicama na rukama i snijegom na ramenima kako trči kroz hodnik i sakriva se u ured šerifa. Zamjenik je *pripazio* na Valentina dok nisu stigli policajci od kojih je pobjegao.

Valentino će vjerovatno dobiti dodatnu kaznu za pokušaj bijega.

### Pranje novca u veš-mašini

**Athony Digosaffatte** i **Paul Villanueva**

ukrali su 65.000 dolara iz banke u njujorškom naselju Queens. Tokom krađe je eksplodirala kutija u kojoj se nalazila crvena boja koja se koristi za zaštitu odnosno obilježavanje ukradenih novčanica. U želji da ostanu neotkriveni, novac su oprali, ali bukvalno. Odnijeli su ga u hotelsku pronicu za veš i oprali na 90 stepeni čime su novac potpuno uništili. Uhapšeni su kada su ih prijavili očevici u praonici kojima nije bilo jasno zašto neko stavlja hiljade dolara u mašinu za veš.



# Djeca na nišanu roditelja

**U posljednja dva mjeseca tri maloljetnika, od kojih dvojica smrtno, nastradali su zbog igranja s oružjem. Prema nezvaničnim podacima, svaki četvrti stanovnik u BiH je naoružan ili slikovitije rečeno jedna kuća - jedna puška**

PIŠE: Ekrem Tinjak  
FOTO: Arhiv Starta

Jedanaestogodišnji **Arnel Pjanić** poginuo je 2. januara ove godine u porodičnoj kući u Pjanićima kod Cazina dok se igrao očevim pištoljem. Nesretni dječak se oružjem igrao dok su njegovi roditelji **Jasmina** i **Aziz** bili u komšiluku. Dječak je zadobio smrtonosnu povredu u predjelu glave.

Pred kraj prošle godine desetogodišnji **N.Č.** iz Sarajeva preminuo je od posljedica povrede zadobijene hicem iz pištolja. Desetogodišnjaka je hicem iz pištolja pogodio njegov dvije godine stariji prijatelj **A.B.**

U jednoj kući u naselju Boljakov Potok grupa od pet dječaka je pronašla oružje - pištolj i podrezanu pušku. Prilikom dječije igre slučajno je ispaljen metak od kojeg je dječak stradao.

Nekoliko dana prije ovog tragičnog događaja, jedanaestogodišnji **Marko V.** iz Zenice, iz radoznalosti je aktivirao ručnu bombu kašikaru. Zadobio je teške povrede šake lijeve ruke. Nasreću, hitno je prebačen u kantonalnu bolnicu, gdje je operiran i zbrinut, a potom je smješten na Odjeljenje traumatologije.

### **Poražavajuće brojke**

Prema nezvaničnim procjenama, svaki četvrti stanovnik Bosne i Hercegovine posjeduje oružje čije



### **Bomba u smeću**

Građani BiH nerado predaju oružje. Jedan od razloga je i strah da će biti kažnjeni. Većina, naime, ne zna da su oni koji sami predaju oružje oslobođeni krivične odgovornosti i protiv njih se ne pokreće krivični postupak.

Zbog ovog neznanja, oni građani koji bi da se ipak oslobode oružja postupaju sasvim nelogično i opasno. Naime, neki od njih se oružja oslobađaju na način da ga bace u korito rijeke, u kontejner, na deponiju, u šumu... A to samo može ugroziti ljudske živote.

Takav slučaj nedavno se desio u okolini Banje Luke. Prilikom uklanjanja divlje deponije u Glamočanima, na području banjalučke regije, radnici preduzeća *Eko-euro tim* među otpadom su pronašli i nekoliko eksplozivnih sredstava. Pronađene su četiri ručne bombe, dva tromblona i nešto municije. Nasreću, oružje su otkrili radnici, a ne djeca koja se često igraju u blizini.

porijeklo se obično definiše kao nelegalno. Ili još upečatljivije rečeno - jedna puška-jedna kuća! Prema policijskim podacima, u preko 95 posto slučajeva krivičnih djela počinjeno je nelegalnim oružjem. Što znači da je od sto ubistava ili samoubistava počinjenih vatrenim oružjem tek pet učinjeno oružjem

za koje postoji validna dozvola.

Da je BiH puna nelegalnog oružja pokazuje podatak da su u policajci CJB Banja Luka prošle godine, u toku redovnog postupka, oduzeli 138 pušaka, 144 pištolja, 77 minsko-eksplozivnih sredstava i 8.359 komada municije raznog kalibra. Njihove kolege iz Sarajevskog kantona u istom periodu zaplijenili su 84 puške, 172 pištolja, 33 bombe i više od deset hiljada metaka raznog kalibra.

Poređenja radi, u vojnoj doktrini se podrazumijeva da jedan vod, kao vojna formacija, broji od 25 do maksimalno 40 vojnika. Samo treba sabrati brojke spomenutog oduzetog oružja i opremiti zamišljene vojnike tim takozvanim lakim naoružanjem. U konačnici to znači opremanje približno šest jedinica formacije voda, odnosno, dvije vojne čete! Nedavno je u Mašinskoj školi u

Prijedoru učenik prvog razreda **D.B.** u džepu donio ručnu bombu kašikaru. Htio je prodati. Nasreću, njegov kolega iz klupe je primijetio bombu u džepu, potom se iskrao iz učionice i slučaj prijavio policiji. Policija se za nekoliko minuta uvjerila u istinitost dojave.

Maloljetni **D.B.** je u policiji, uz prisustvo oca, dao izjavu u kojoj je naveo da je bombu u školu donio u namjeri da je proda prijateljima za 10 maraka! U izjavi je naveo da je bombu kupio od nekog čovjeka u selu Jelovac kod Prijedora.

### **350.000 tona nepotrebnog oružja**

Domaća policija uz pomoć međunarodnih vojnih i policijskih snaga u BiH već godinama provodi akcije prikupljanja oružja zaostalog nakon četverogodišnjeg rata. Do danas je u različitim akcijama zaplijenjeno i prikupljeno više od 40.000 komada oružja različitog kalibra. Ovome treba dodati da se mjesečno u BiH uništava oko 100 tona oružja koje se proglašava viškom.

Prema nekim pretpostavkama, na teritoriji BiH nalazi se oko 350.000 tona nepotrebnog oružja i streljiva. Ako bi se to uzelo kao validan pokazatelj, onda se dolazi do zaključka da uz postojeći tempo prikupljanja i uništavanja, za potpuno čišćenje države od nelegalnog i nepotrebnog oružja treba najmanje 20 godina.

Stručnjaci misle da bi to mogao biti i veliki finansijski problem. Prema njihovim proračunima, za uklanjanje i uništavanje tolikih količina oružja potrebno je najmanje 20 miliona dolara. Vijeće ministara BiH je zbog ovoga, za sada samo usvojila nacionalni plan za borbu protiv ilegalnog oružja.

Kakve će rezultate donijeti, mnogo je nestrpljenjem očekuju. ■

### **Vrati oružje, osvoji oruđe**

Jedan od zanimljivijih akcija prikupljanja oružja, pored stalne akcije *Žetva* koju provode multinacionalne snage u BiH, desila se nedavno. U stvari, to je bio pilot projekat UNDP-a pod nazivom *Vrati oružje - osvoji oruđe*. Pravila te, po mnogo čemu jedinstvene nagradne igre, bila si vrlo jasna. Svaki građanin koji je u mjesec dana predao nelegalno oružje na posebno predviđenim mjestima ulazio je u bubanj za izvlačenje vrijednih nagrada, među kojima su bili skuteri, DVD playeri, hladnjaci i drugi kućanski aparati. Učesnicima je garantirana anonimnost i amnestija od kaznenog progona, koja je u BiH ionako zakonski predviđena za sve građane koji dragovoljno predaju ilegalno oružje. Ova nagradna igra bila je predviđena za samo dvije općine Novo Sarajevo i Istočna Ilidža. Za mjesec dana prikupljeno je 332 komada oružja, uključujući pištolje, puške, ručne bombe i zolje, te oko 5.000 komada municije različitog kalibra.

# Roditelji ne vjeruju rezultatima istrage

Okolnosti pod kojima je Vladimir dospio u rijeku Vrbas nikada nisu utvrđene. Zaključak specijaliste sudske medicine na osnovu obdukcionog nalaza bio je da je smrt bila nasilna i da je nastupila usljed utapanja

PISE: Amarildo Gutić  
FOTO: Arhiv Starta


U noći između 19. i 20. decembra 2004. godine nestao je 23-ogodišnji Banjalčanin **Vladimir Cvijić**. Devet dana kasnije, 29. decembra pronađen je mrtav u rijeci Vrbas u Čardačanima, kod Laktaša. Iako je Okružno tužilaštvo Banja Luka službeno proglasilo da je riječ o nesretnom slučaju i da nema razloga za istragu, porodica nasturalog mladića još uvijek pokušava pronaći nepoznate detalje o razlozima njegovog utapljanja.

Okolnosti pod kojima je Vladimir dospio u rijeku Vrbas nikada nisu utvrđene.

Zaključak specijaliste sudske medicine na osnovu obdukcionog nalaza bio je da je smrt bila nasilna i da je nastupila usljed utapanja. Na glavi su evidentirane dvije rane koje su, prema mišljenju ljekara, mogle nastati usljed udara glave u tupu i tvrdu površinu, jedna prije, a druga nakon smrti. Okružno Tužilaštvo Banja Luka je zaključilo da se smrt Vladimira Cvijića ne može dovesti u vezu sa izvršenjem krivičnog djela, niti da za to ima dokaza. Već dvije godine roditelji pokojnog Vladimira pokušavaju dobiti odgovor na niz pitanja.

- **Kada sam bio na identifikaciji vidio sam da na sebi nije imao**

**Zaključak specijaliste sudske medicine na osnovu obdukcionog nalaza bio je da je smrt bila nasilna i da je nastupila usljed utapanja**



gornjeg dijela odjeće, kao i da je na oba koljena imao poderotine. Pitam se kako je to moglo nastati, ako je skočio u rijeku. Sve izgleda kao da ga je neko vukao prethodno po zemlji, što mi je potvrdio i obducent - navodi **Milivoje Cvijić**, otac pokojnog Vladimira.

Prema svjedočenjima, Vladimir je tu noć bio kod kumova na slavi, a potom je sa prijateljima otišao u noćni klub gdje su se zadržali oko dva časa. Tu je Vladimir imao kraći verbalni sukob sa jednom osobom. Kada su krenuli kući tražio je da se vrate na još jedno piće, ali ostali nisu htjeli. Oni tvrde da je izašao iz automobila oko dva sata iza ponoći, na raskrsnici u blizini pija-

## Vitez: Zapaljen načelnikov automobil

Devetog novembra oko 20 sati ispred Hrvatskog doma u Vitezu zapaljeno je vozilo *fiat morea*, vlasništvo **Vlade Alilovića**, načelnika općine Vitez. Prema iskazima svjedoka, prvo se čula jaka detonacija, a potom je vozilo zahvatio plamen. Jedan broj svjedoka primijetio je i dvije osobe koje su se trčeci udaljile prije eksplozije, no zbog mraka nije bilo moguće da ih detaljnije opišu. Istražitelji su obavili uviđaj, no na licu mjesta nije bilo mnogo tragova. Načelnik **Vlado Alilović** je rekao da mu nije poznat razlog ko bi i zašto ovo učinio.

ce kod željezničke stanice u Banjoj Luci. Prijatelj kaže da se vratio malo kasnije po njega, ali da ga nije mogao pronaći. I u ovom segmentu istrage roditelji imaju primjedbe, jer im nije poznato da li su saslušana sva lica koja bi mogla imati određena saznanja, a tvrde da su zvanične i nezvanične izjave onih koji su ga posljednji vidjeli različite.

Vladimirova majka **Slavica Cvijić**, apeluje:

- **Želim istinu, pozivam drugove koji su bili u s njim te večeri da kažu kako je tačno bilo, da konačno saznam ko ga je u hladnu vodu bacio.**

Prema listingu korištenja Vladimirovog mobilnog aparata, aparat je isključen 20. decembra u 2 sata i 18 minuta iza ponoći, što je približno vrijeme kada je prema obdukciji nastupila njegova smrt. Roditelji navode da su imali i telefonske pozive sa porukama da je Vladimir viđen u danima nakon nestanka u Kneževu, ali i navode da je noćni čuvar, u blizini mjesta gdje je Vladimir izašao iz vozila, čuo jauke nekog mladića koji je molio za pomoć. No, sve su to neproverene informacije koje uzrokuju da roditelji ne vjeruju u zvanične rezultate istrage o smrti njihovog sina te pokušavaju i ovim putem eventualno doći do novih informacija. ■

## Bugojno: Razbojništvo na Kandijama

Devetog aprila 2005. godine oko 22 sata i 10 minuta na lokalitetu Kandija u Bugojnu teško je ranjen **Edhem Đuliman** (27). Na njega je pucala nepoznata muška osoba iz automatske puške, ispalivši tri metka. Edhem Đuliman je vozilom marke *golf* oko 22 sata došao na lokalitet Kandija. S njim je bila i njegova tadašnja djevojka a sadašnja supruga. Nakon parkiranja, sa lijeve bočne strane vozila prišla je nepoznata, maskirana osoba. Bez riječi je uperila pušku prema Edhemu, a nakon što je on pokušao otvoriti vrata, ispalila je tri metka. Potom se udaljila stazom prema šumi. Ovo nije jedini slučaj da je na ovom mjestu ta osoba prilazila parkiranim vozilima. Izvršena je i jedna pljačka i također ispaljenje iz automatske puške, ali srećom bez žrtava.


## Mostar: Osvetnik sa automatskom puškom

Na brdu Fortica iznad Mostara 21.11. 2005. godine u 20 sati i 45 minuta teško su ranjeni **Mustafa Grbić** i ženska osoba pod inicijalima **A.M.** U vozilo golf u kojem su se nalazili, nepoznata osoba je ispalila rafal iz automatske puške. Unatoč teškom ranjavanju, A.M je pozvala pomoć, nakon čega su prebačeni u mostarsku bolnicu. Ona je zadobila višestruke povrede ruku i noge, a Mustafa Grbić je zadobio prijelom lobanjskih kostiju, višestruke prostore rane stomaka te ruke. Napadač je očito znao vrijeme i mjesto gdje će se Grbić dovesti automobilom. Pretpostavlja se da je prišao stražnjem dijelu vozila te iz neposredne brzine ispalio rafal od 26 metaka. Motivi napada nisu utvrđeni. Istražitelji pretpostavljaju da je u pitanju osveta.

# NESTALI



Ime: Alija  
Prezime: Mešić  
Ime majke: Mubera  
Spol: Muški  
Datum rođenja: 29.09.1994.  
Mjesto prebivališta: Travnik  
Karakteristike: Mole se svi koji imaju informacije o ovoj osobi da iste dostave najbližoj policijskoj postaji ili putem telefona 122 ili Operativnom dežurstvu Federalne uprave policije 033 261 300.



Ime: Hanka  
Prezime: Bajramović  
Ime oca: Sejfo  
Nadimak: -  
Spol: Ženski  
Datum rođenja: 1983.  
Mjesto rođenja:  
Kakanj  
Karakteristike:  
Nestala u augustu 2006.




Ime: Mario  
Prezime: Mihalj  
Spol: Muški  
Datum rođenja: 1. novembar 1980.  
Mjesto prebivališta: Mostar  
Karakteristike: Nestao 20. septembra 2006.  
Opis lica:  
Visok 170 cm, mršavije građe, crne kose, na lijevom ramenu ima istetorviran znak škorpiona.

# TRAŽE SE



Ime: Omer  
Prezime: Mustafić  
Datum rođenja: 03.01.1946.  
Mjesto rođenja: Čaglica, Velika Kladuša  
Mjera: Hapšenje  
Traži se zbog: Krivičnog djela zloupotrebe položaja iz člana 358, stav 3 u vezi sa članom 1 KZ SFRJ  
Po nalogu: Kantonalnog suda Bihać  
Obavijestiti: Najbližu policijsku stanicu



Ime: Mirsad  
Prezime: Bašić  
Datum rođenja: 01.08.1972.  
Mjesto rođenja: Žepče  
Mjera: Hapšenje  
Traži se zbog: Krivičnog djela - teške krađe iz člana 287, stav 1 tačka a KZ FBiH  
Po nalogu: Općinskog suda Bosanska Kupa  
Obavijestiti: Najbližu policijsku stanicu



Ime: Hasib  
Prezime: Mujić  
Nadimak: Biba  
Datum rođenja: 13.08.1954.  
Mjesto rođenja: Glogovac, Cazin  
Mjera: Hapšenje  
Traži se zbog: Krivičnog djela ubistva iz člana 171, stav 1 ranijeg KZ SFRJ  
Po nalogu: Kantonalnog suda Bihać  
Obavijestiti: Najbližu policijsku stanicu

**UKOLIKO IMATE BILO KAKVE INFORMACIJE O OVIM OSOBAMA  
JAVITE SE KRIMOLOVCIMA NA TEL.: 080 020 505**

## VAŠA POLICIJA

